

Naum ayvu oĩa Naum ayvu oĩa

Profeta Naum oiko jave ma Assíria pygua kuery omongyje rei okuapy Judá kuery. Ha'e kuery ma nhomboaxy va'e'ŷ ha'e ipo'akapave va'e ikuai, oitypaxe guive Judá kuery. Mava'e 'rã tu ojoko Judá kuery omomba e'ŷ aguã? Naumombovai: “Senhor Nhanderuete ma nda'evei etea ha'e opoxya oexa uka va'e. Opoxya rupi nhombopaga 'rã opa mba'e py. Ngovaigua kuery pe Senhor ipoxy vy ombopaga 'rã ija'e e'ŷ va'e. ... Senhor ipoxy rã mava'e 'rã tu ogueropo'aka kuaa? Mava'e tu oikoveve 'rã opoxy etea oexa uka va'e renonde? Mba'eta ipoxya ma tata rami 'rã ou, itaova ikuai va'e omboa'ypa 'rã guive” (1.2,6).

Ha'e rã Nhanderuete pegua kuery pe ma aipoe'i: “Senhor ma poroayvu va'e. Jajexavaia ára ma nhanhemi aguã oiko, mba'eta oikuua hexe onhemi va'e kuery ha'e javi”, he'i (1.7). Ha'e nunga rupi mba'emo oiko teñ jarovy'a 'rã Nhanderuete nhandere openaa.

Nhanderuete poxya ha'e nhomboaxy re ijayvua

¹ Nínive tetã pygua kuery rovai ayvu oĩa.* Kova'e kuaxia para re oĩ Elcos pygua Naum pe oexa uka pyre.

² SENHOR Nhanderuete ma nda'evei etea ha'e opoxya oexa uka va'e. Opoxya rupi nhombopaga 'rã opa mba'e py. Ngovaigua kuery pe SENHOR ipoxy vy ombopaga 'rã ija'e e'ŷ va'e.

* 1:1 Nínive tetã ma Assíria yvy regua tuvixave va'e. Ha'e katy Nhanderuete omondouka Jonas ojeko rerova aguã regua omombe'u aguã. Ha'e kuery ojeko rerova va'eri ha'ekue rami ae ikuai, nanhomboaxyi vy amboae regua omokanhymbaa rupi.

³ SENHOR ma nda'ivai ma rei 'rā va'eri ipo'akapa va'e vy nomboeko porāi 'rā heko vai va'e. Yvytu jere ha'e yvytu atāa rupi SENHOR oguata va'e, ha'e arai re opyrō 'rā yvy ku'i rupi rami.

⁴ Ye'ẽ pe ijayvu vy omboypa, yakā ikuai va'e voi omboypa kuaa va'e. Ha'e ramo Basā ha'e Carmelo yvy rupi ipirupa. Líbano yvy re yvoty ikuai va'e voi ixorimb'a 'rā.

⁵ Henonde ma yvyty ikuai va'e oryryipa, yvy'ã ikuai va'e voi okanhymba. Henonde rupi yvy opu'ã 'rā ho'amy, yvy ha'e javi, ha'e yvy re ikuai va'e voi.

⁶ SENHOR ipoxy rā mava'e 'rā tu ogueropo'aka kuaa? Mava'e tu oikoveve 'rā opoxy etea oexa uka va'e renonde? Mba'eta ipoxya ma tata rami 'rā ou, itaova ikuai va'e omboa'ypa 'rā guive.

⁷ SENHOR ma poroayvu va'e. Jajexavaia ára ma nhanhemi aguã oiko, mba'eta oikuaa hexe onhemi va'e kuery ha'e javi.

⁸ Ha'e rā Nínive tetā ma SENHOR omomba vyvoi 'rā, yy tuvixa va'e oua rami. Ngovaigua kuery oakykue monha 'rā pytū rupi.

⁹ Mba'exa tu penhembopy'a pekuapy SENHOR rovai? Ha'e ae 'rā penemomba vyvoi. Penembojexavaiarā ou vy petēgue'i pyve penemokanhymba 'rā.

¹⁰ Mba'eta peē kuery ma juuty mbyte py penhemimba, ha'e oka'u va'e rami vinho pendejee penhoëmba tēi penemokanhymba 'rā mba'emo pirekue okaia rami.

¹¹ Nínive tetā pygua kuery, pendereta tēi petē oo SENHOR rovai onhembopy'a va'e, ha'evel'ýa rami nhomongeta va'e.

¹² Po rami SENHOR ijayvu:

— Penembaraete ha'e pendereta tēi penemombaa 'rā. Ha'e rami vy pekanhymba 'rā. Xee ae 'rā rombojexavai, ha'e gui ma norombojexavaivei 'rā.

¹³ Ha'e gui peẽ Judá kuery, pende'áry gui ma amopẽmba 'rã ha'e kuery canga omoĩ va'ekue. Amondopa 'rã ixã pendejokuaague.

¹⁴ Ha'e rã peẽ Assíria pygua kuery, SENHOR ijayvuague rami vy nda'ipoavei 'rã peneramymino kuery penderery rupi oenoĩ mbyrã. Penderuete ramigua kuery pegua oo gui ma amomba 'rã ta'angaa ikuai va'e, mba'emo ryku guigua guive. Pendereko vai ramo ajapo 'rã yvykua py penenhonoa aguã rami. — he'i.

¹⁵ Ne'exa, yvyty áry rupi ou oiny ayvu porã mombe'ua, pendekuai porã aguã regua omombe'u va'erã. Ha'e nunga rupi Judá kuery, pejapo ju ngaru, ha'e pejapo penhemboayvuague, mba'eta pendea py avakue heko vai va'e ndouvei ma 'rã. Ha'e va'e kuery ma omokanhymbaa ae ma.

2

Nínive tetã ojokoa vy ipo'akaa ete aguã re ijayvuague

¹ Nínive tetã pygua kuery, ou ma oiny penemokanhayarã. Penhangareko oo ikorapa va'e re, pearõ tape, pemombaraete pendekupe, pemono'õmba pendexondaro kuery tei.*

² (Ha'e rami avi SENHOR omoimba ju 'rã Jacó kuery po'akaa, Israel kuery po'akaa omoĩ ju 'rãa rami ae avi, imba'e rei-rei oguereko va'ekue oipe'apaa ha'e uva'y ikuai va'ekue ombovaipaa rire tei.)

³ Nínive pygua kuery va'e regua imbaraetekueve ma oguereko hu'y jokoa pytã va'e, avakue ipy'a guaxukueve ma pytã va'e py 'rã onhemonde, karóxa oguereko katupa ára py aço oĩ va'e overapa, hu'y guaxu voi overa rei va'e.

* 2:1 Apy ma Nhanderuete omombe'u uka ma voi Nínive tetã re hovaigua kuery opu'ã okuapy 'rãa.

⁴ Tape ikuai va'e rupi karóxa oaxa-axa va'e ma oo atã, ha'e tetã mbyte rupi joaxa-axa 'rã inhakuã reve. Tataendy rami 'rã onha, overa va'e rami.

⁵ Ha'e pygua yvatekueve oenoõ ukapaa va'eri ha'e kuery onhepyxangapa 'rã ouvy tape rupi. Tetã kora yvýry ovaõ aguã ojapura jogueravy tei nhovaexi 'rã ngovaigua kuery ojerovia rei ha'e hembiporupa va'e reve.

⁶ Yakã jokoa ikuai va'e oipe'aa rã ombovaipa huvixa ro.

⁷ Nínive tetã ma huvixa kunha rami opyta va'ekue ri ijayvuague rami vy ixugui oipe'apaa mba'emo, ha'e pygua kuery escravo-rã ogueraapaa guive. Ha'e ramo hembiguai kuhnataõgue apykaxu rami ojae'o okuapy opexo re oipete-pete reve.

⁸ Nínive tetã ma oiko ypy guive yy omboty pyre rami ae tema oõ va'ekue ri aõ ma okanhymba ma ový. Ojapukai reve “Pepyta! Pepyta!” 'ea tei mava'eve ndojevyai.

⁹ Ha'e gui “Peipe'a na prata ha'e ouro oõ va'e, mba'eta mba'emo omoõ porã mbyre ndogueraapaa teri. Oõ reta teri opa mba'e oipotapy”, 'ea.

¹⁰ Ha'e gui ma “Aikore! Mba'eve noõvei ma, ivaipa va'e anho, ombovaipaa ma!” 'ea. Ha'e rami vy ha'e kuery py'a hykupa, henapy'ã ryryipa rei guive, pavẽ ryepy rupi ojexavaia anho oendu, ha'e javi rova xiiguepa rei guive.

¹¹ Mamo tu oõ aõ guary kuery kua ha'e ta'y'i kuery okaruaty? Mba'eta ha'e va'e rupi guary oiko-ikoaty, guary kunha ta'y'i reve mava'eve omondyi e'ý re oiko va'ekue.[†]

¹² Guary ojuka reta va'ekue gua'y kue'iry ho'u va'erã, guaõ py ojuka va'ekue guary kunha pe omboja'o va'erã. Itakua oïaty omonyëmba va'ekue ojuka va'ekue-'ekue re'õgue, xo'o anho ikua rupi oõ va'ekue.

¹³ SENHOR ixondaro reta va'e aipoe'i:

[†] 2:11 Nínive tetã pygua huvixa kuery pe ma “Guary kuery” 'ea raka'e.

— Ne'exa, xee ma nderovai aiko. Ha'e rami vy aapypa 'rā ndekaróxa hataxī reta reve, kyxe py ajuka ukapa 'rā ndera'y kue'iry, ha'e ndeyvy gui aipe'a ukapa 'rā nerembia. Ha'e ramo noenduavei ma 'rā ndeayvu reraa kuery — he'i.

3

Nínive tetā ombovaipaa aguā re ijayvuague

¹ Nda'evei ete 'rā tetā jouguy moēa anho ikuai va'e pe. Ijapua ha'e mondaa tynyē va'e, ha'e mba'emo oipe'aague oī riaeal!

² Pendu ke: vaka pi revovo, karóxa ruéra ryapu, kavaju ou nhendua, ha'e karóxa oaxa nhendu va'e.

³ Ne'exa, kavaju árygua kuery ogueronha atā, kyxe hex-akāmba, hu'y guaxu overapa, oikutu pyre heta ikuai, manogueatly, manogue opa e'ŷ va'e. Omanogue ikuai va'e re onhepyxangapaa rive.

⁴ Ha'e nunga ha'e javi ma kunha tavy reia iporā va'e káuxa. Ha'e va'e ma mba'evyky ja avi. Ovende amboae regua otavya py, oo pygua kuery ovende avi omba'evykya py.*

⁵ SENHOR ixondaro reta va'e aipoe'i:

— Ne'exa, xee aiko nderovai. Aupi 'rā ndetupyja hapy gui nderova áry peve. Ha'e rami vy amboae regua kuery pe aexa uka 'rā ndepire reia, ha'e tetā ikuai va'e pe aexa uka 'rā rexīa.

⁶ Nde'áry amombo 'rā ha'eve'ŷ va'e, rombojaru rei 'rā, ha'e roeja 'rā pavē rembiexarā.

⁷ Ha'e ramo nderexaa kuery onhamba 'rā ndegui. Ha'e vy aipoe'i 'rā: “Nínive tetā ivaipa ma. Mava'e tu omboaxy 'rā? Magui tu ajou 'rā heronhemboaxyarā?” he'i 'rā.

⁸ Nínive tetā, ndee teve Nô-Amom gui ha'eveva va'e? Mba'eta ha'e va'e tetā ma Nilo yakā ha'e yy omboty pyre

* 3:4 Nínive tetā pe ae “Kunha tavy reia” he'i profeta.

mbyte py oĩ va'ekue. Jovaive rupi yy oĩ. Ha'e rami vy tetã kora 'rãgue py ye'ẽ oĩ va'ekue hovaigua jokoarã.[†]

⁹ Etiópia ha'e Egito yvy pygua opa mba'e py oipytyvõ aguã rami ikuai va'ekue. Pute ha'e Líbia yvy pygua voi ipytyvõarã ikuai avi va'ekue.

¹⁰ Ha'e rami teĩ ogueraapaa raka'e escravo-rã. Ta'y kuery voi ojukapa tape ojerea ikuai va'e rupi. Yvatekueve re oexaa okuapy xortea, ha'e ipo'akakueve voi ombo'apaa corrente py ojokua reve.

¹¹ Ha'e rami ae avi Nínive tetã, ndee voi neakanhy vy renhemi 'rã. Ndee reka avi 'rã nderovaigua kuery gui renhemi aguã.

¹² Ndea py oo ikorapa va'e ha'e javi ma ára pyau jave figo'a rami rive opyta. Mba'eta ombovavaa ramo rive ho'apa 'rã hi'uxea kuery juru py.

¹³ Ne'exa, ndea py xondaro kuery ikuai va'e ma kunhague rami meme opyta. Ndeyvy rupi tetã kora rokẽ ikuai va'e ojepe'apa 'rã nderovaigua kuery oikepa aguã, okẽ jokoa okaipa rire.

¹⁴ Penoẽ yy peneretã ojokoa jave guarã, pemombaraeteve pendero ikorapa va'e. Tapeo yapo py, pepyrõ yapo hapomo rei re, yvy jykue ombojo'aague pemoatyrõ aguã.

¹⁵ Ha'e rami teĩ penemombaa 'rã tata py, kyxe py guive pendejukaa 'rã. Tuku rami 'rã penemokanhymba. Tuku rami pendereta, tuku-karu gui penderetave teĩ,

¹⁶ jaxy-tata yva re ikuai va'e gui mba'emo vendea kuery pereko va'e hetave teĩ tuku-karu oike 'rã pendea py, ha'e gui oẽ ju 'rã oveve reve.

¹⁷ Penderegua yvatekueve ma tuku rami ikuai, ha'e pendea py joe opena va'e kuery ma tuku tuvixakueve rami,

[†] 3:8 Nô-Amom ma tetã guaxu Egito yvy re oĩ va'ekue ri Assíria pygua kuery ombovaipa raka'e.

mba'eta yro'y jave py onhemi 'rā oo mbotya re, va'eri kuaray yvate'i ramo ovevepa 'rā oje'oivy. Ha'e ramo ndoikuaavei 'rā ooague.

¹⁸ Ndee Assíria pygua huvixave, ndevyguá joe opena va'e kuery okepa okuapy, yvatekueve voi. Ndevyguá kuery oaĩmba ma yvy'ã ikuai va'e katy, ha'e ndoikoi imono'õ jevyarã.

¹⁹ Ndeai pegua moã ma ndoikoi, okuera e'ŷ va'erã ae. Nderekokue oendu va'e kuery ojepopetepa 'rā nderovai. Mba'eta ha'e javi regua re rembou va'ekue imoingo ax-yarã.

Nhanderuete ayvu iky'a e'ŷ va'e

New Testament in Guaraní, Mbyá

copyright © 2004 Wycliffe Bible Translators, Inc.

Language: Mbyá Guaraní (Guaraní, Mbyá)

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 853110565X

The New Testament

in Guaraní, Mbyá

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 29 Jan 2022 from source files dated 29 Jan
2022
3309fa3b-7590-5ae9-b829-5df4ddfbf957